



Nicodème craignant la calomnie des Juifs, vient de nuit voir Iesus-Christ, duquel il est instruit.

OMBIEN que les Pontifes Iudaïques fussent fort corompus en leurs mœurs ; si est-ce que Nicodème Pharisien , l'un des principaux des Juifs, que Iesus appelle Maistre en Israël ; & Ioseph d'Arimathie honneste Conseiller , estoient gens de bonne vie , ayans la crainte de Dieu , comme ils ont plus hardiment montré apres la mort de Iesus-Christ, que durant sa vie : toutesfois Nicodème est venu de nuit à Iesus-Christ pour conferer des mysteres secrets ; & l'interrogeant luy dist , Maistre nous sçauons que tu es venu de Dieu ; car nul ne peut faire les signes que tu fais , si Dieu n'est avec luy. Iesus luy répondant , dist ; En verité, en verité, qui n'est nay derechef, ne peut voir le Royaume de Dieu. Enfin apres quelque dispute sur cette parole, Iesus luy montra doucement quelle estoit la vraye regeneration des fideles , & que ces paroles estoient spirituelles. Aussi ce bon personnage est grandement à louer, de ce qu'alors que les Pharisiens enuoyèrent des gens-d'armes pour prendre Iesus, & le mettre à mort, il leur dist ; Nostre Loy ne iuge personne auant que l'auoir veu & connu. Et ceux qui en auoient charge, oyans parler Iesus-Christ, furent si ravis, qu'ils s'en retournerent sans rien faire.